

समे – 12:25 hrs.

<><><><><><>

PM-Employment

प्रधानमंत्री नरेंद्र मोदी होर अज्ज वीडियो कांफ्रेंसिंग राएं रोजगार बारै लोआए जा रदे बजट दे बाद आहले वेबीनार च हिस्सा लेंगन। वेबीनार दे प्रमुख विषयें च लोकें च निवेश, अर्थ बवस्था ते नवाचार शामिल न। प्रधानमंत्री होर इस मौके पर किट्ठ गी संबोधित बी करडन। एह वेबीनार सरकार, उद्योग, शिक्षाविदे ते नागरिकें बशकार सहयोग गी बढ़ावा देग ते सुधारवादी बजट घोषणाएं गी असरदार नतीजे च बदलने लेई चर्चाएं गी बढ़ावा देग।

<><><><><><>

Budget Session

जम्मू-कश्मीर विधानसभा च अज्ज लेफ्टिनेंट गवर्नर मनोज सिन्हा हुंदे अभिभाषण पर धन्नवाद प्रस्ताव चर्चा शुरू होई। केई सारे मिम्बरें इस चर्चा च हिस्सा लैता ते केंद्र शासित प्रदेश च जारी ढांचागत विकास दी सराहना कीती। विधानसभा सदस्यें सेहत दिक्खभाल आहली सुविधाएं, बिजली दी बण्ड आहली बवस्था, पानी सप्लाई ते शैक्षणिक ढांचे दे विकास गी मती तरजीह दिते जाने दी मंग पुट्टी।

<><><><><><>

Khelo India

युवा मामले में खेड़ मंत्री सतीश शर्मा हौर कल उपराज्यपाल मनोज सिन्हा हौरेंगी मिले ते उनेंगी 9 मार्च कोला 12 मार्च तगर गुलमर्ग च आयोजित होने आहली खेलो इंडिया स्यालू खेड़ें लेई साददा दित्ता। एहदे शा पैहले मुखमंत्री उमर अब्दुल्ला हौरें खेलो इंडिया विंटर गेम्स दी अधिकारिक वेबसाइट लांच कीती ही। पैहले इनें खेड़ें दा आयोजन 22 थमां 25 फरवरी गी होना हा, पर पर्याप्त बर्फबारी नेई होने कारण इसी अगड़ा पाई दित्ता गेआ हा। इनें खेड़ें च करीब 700 प्रतिभागी हिस्सा लै रदे न जिंदे च 650 तकनीकी अमला, प्रतिनिधिमंडल ते स्थानीय एथलीट शामिल होडन। एह खडारी Alpine Skiing, Nordic Skiing, Ski Mountaineering ते Snow Boarding सने 6 बक्ख-बक्ख चाल्ली दे खेड़ मकाबलें च अपना दमखम दस्सडन।

<><><><><><>

Trump

अमरीका दे राष्ट्रपति डोनाल्ड ट्रम्प हौरें पैरिस जलवायु समझौते थमां बाहर निकलने दे अपने फैसले दा बचास करदे होई आखेआ जे इस समझौते करी अमरीका गी केई ट्रिलियन डालरें दी कीमत चुकानी पवै करदी ही। उनें आखेआ जे उन्दा प्रशासन हर रोज इस गल्ला दा जतन करा करदा ऐ जे अमरीका दे भविक्ख गी सुरक्षित बनाने लेई लोड़चदी तब्दीलियां आहनी जान। ट्रम्प हौरें एह गल्ल दुई बारी अमरीका दे राष्ट्रपति बनने परेंत पैहली बारी संसद दे दौनें सदनें दे सांझे इजलास गी संबोधित करदे होई आक्खी। ट्रम्प हौरें आखेआ जे उनें अमरीका च

आम विश्वास आहली भावना परतियै बहाल करने दे मकसद कन्नै 100 शा मते कार्यकारी आदेशों पर दस्तखत कीते न ते 400 शा मती कार्यकारी कारवाइयें गी तोड़ चाढ़ेआ।

<><><><><><>

ICC Finals

आईसीसी चैंपियंस ट्रॉफी दे कल दुबई च खेड़े गेदे पैहले सेमीफाइनल मुकाबले च भारत नै अस्ट्रेलिया गी हराइयै फाइनल च अपनी थाह बनाई लैती ऐ। जंदी संझां 265 दे लक्ष्य दा पिच्छा करदे होई भारती टीम नै 11 गेंदां बाकी रौहदे बड़े अराम कन्नै 267 द्रौड़ां बनाइयै मैच अपने नांs करी लैता। सब्भनें शा मती 84 द्रौड़ां बनाने आहले विराट कोहली होरेंगी प्लेयर ऑफ दा मैच घोषित कीता गेआ। तोआईं अज्ज पाकिस्तान दे ल्हौर च खेड़े जाने आहले दुए सेमीफाइनल च न्यूजीलैंड दा मुकाबला दक्खन अफ्रीका कन्नै होग। इस मैच दी जेतू टीम दा मुकाबला ओंदे ऐतवारें, फाइनल च भारत कन्नै होग।

<><><><><><>

Women Panchayats

पंचायती राज मंत्रालय आसेआ अज्जै थमां नमीं दिल्ली च इक राश्ट्रीय सम्मेलन च महिलाएं दे अनुकूल ग्राम पंचायत माडल दी शुरूआत कीती जा'रदी ऐ। एह पैहलकदमी महिला दिवस 2025 समारोह दा इक हिस्सा ऐ। इस पैहल दा मुख मकसद हर जिले च घट्टोघट्ट इक महिला अनुकूल ग्राम पंचायत स्थापित करना ऐ। एह लैंगिक संवेदनशीलता ते कुड़ियें दे

अनुकूल शासन प्रथाएं लेई इक प्रकाश स्तम्भ दे तौर पर कम्म करोग। इस मौके पर पंचायती राज मंत्रालय दे अप्पर सचिव सुशील कुमार लोहानी होरें टिकाऊ विकास दे लक्ष्यें दे स्थानीकरण पर लोह पांदे होई दस्सेआ जे पंचायती राज मंत्रालय नै टिकाऊ विकास आहले 17 लक्ष्यें गी इस कार्यक्रम दे प्रमुख विषयें च शामिल कीते दा ऐ। उनें आखेआ जे 2030 तोड़ी टिकाऊ विकास आहले लक्ष्यें गी हासल करने लेई पंचायती सतह पर अपनाई गेदी हर इक्क गतिविधि 100 फीसद योग्य लाभर्थियें गी इस पैहलकदमियें दे दायरे हेठ आहनने च मददगार होग। उनें आखेआ जे महिला हितैषी पंचायतें दे विकास गी मती तरजीह दिते जाने दी लोड़ ऐ। कार्यक्रम च पंचैती राज राज्यमंत्री S P Singh Baghel होरें बी अपने विचार सांझे कीते।

<><><><><><>

Army Distributes

फौज आसेआ पुंछ जिले दे मेंढर आहले मॉडल अकैडमी स्कूल सागरा च साईंस लबाट्री लेई जरूरी समेयान बंडेआ गेआ। नेक नियती आहले इस जत्न दा मकसद विद्यार्थयें अंदर साईंसी रूझान गी बढ़ावा देना ऐ तां जे ओह इस खेतर च बक्ख-बक्ख पैहलुएं बारै महत्वपूर्ण जानकारीयां हासिल करी सकन। एह पैहलकदमी फौज आसेआ चलाए जा रदे ऑपरेशन सद्भावना दे तैहत कीती गई ऐ।

<><><><><><>

Medical Camp

लोकें दी सुरक्षा ते कल्याण दे प्रति अपनी बचनबद्धता गी बरकरार रखदे होई भारती फौजे
अखनूर दे बटैहड़ा च मेडिकल कैंप दा आयोजन कीता। एहदा मुंडला मकसद लोकें दी मुफ्त
मेडिकल जांच करना ते इलाके दे गरीब लोकें गी दवाइयां उपलब्ध करवाना हा। कैंप दौरान
कसरी लोकें गी लोड़चदी दवाइयां बंड्डियां गेइयां। समुदाय दे लोकें इस पैहलकदमी लेई व्हाईट
नाईट गनर्स दा दिली धन्नवाद कीता ऐ।

<><><><><><>